

雷波廳志卷三十二

風俗志

上感爲風下應爲俗其機自然不疾而速蠢蠢邊民素稱渾樸秉性不雕服教尤篤慈惠之師賴此民牧戶誦家絃禮陶樂淑大啟文明克敦雍睦四海向風疇其不肅志風俗第三十二

通志漢夷雜居言語各異漢則純而有禮夷則樸而易治多尙謹厚不事繁華

〔土習〕雷波在昔風教未開俗多喬野自升廳設學後父師砥礪多士濯磨近二百年來成均鄉薦代不乏人土習彬彬頗知禮讓遵文守教足迹不履公庭蓋聲教之濡染者久也

〔農工〕山多田少宜種苞穀其最高者則宜陽芋苽麥男女通力合作齊事耕耘暇則入山採樵鬻之於市時或爲人背運貨物以謀升斗緣山附谷趾錯於塗雖貧民勞苦有勤儉之遺然亦習於險阻故也

〔商旅〕土產沃富遠貨他鄉而白布紅鹽則取資於外郡是以道途雖險商賈流通昔年盛時開辦銅鉛木

版筍尖各廠由金沙江順流而下僅七百里三日可達遠方之人聞風麇聚今則廠務衰替江水復多險灘商賈往來踰越山嶺而又迫於夷患迥非昔比矣

〔女紅〕山地寒冷難種木棉婦女不事紡織日用布帛皆取資於他處小康之家亦事縫紉健婦則隨夫樵採或飼蠶飼豕皆可藉羨餘以資家用

〔冠禮〕成婚前一日主人延集親朋請大賓一人僮相四人其大賓以先輩之顯達或子孫眾多者爲之設冠席於東隅設醮席於西隅行三加禮後醮而命之

雷波廳志

卷三十二

風俗

二

字以祝文告於先祖謝賓與僮相畢戚友爲簪花掛紅然後設宴以款親友此禮固無分於貧富也

〔婚禮〕先憑媒妁請庚帖報可謂之定親至男女長成然後具禮物嫁娶前一日男家行醮禮親朋餽賀女家亦於是夕謁祖先聚族款宴謂之花宵禮禮儀豐儉各稱有無有爭財者眾共恥之

〔喪禮〕衣衾棺木各稱其家之有無殮後三日成服訃告遠近諷吉安葬親友咸來弔之每用僧道薦亡鮮遵文公家禮亦俗之靡靡者也

祭禮春秋致祭罕建祠堂四時節序生卒之辰或祀主於家或展拜墓門以伸孝思

夷俗分黑白二種黑骨頭爲蠻酋之嫡派白骨頭乃部落之遺種黑少白多黑主白奴其近漢地居住轄於土司土舍者爲熟夷約三四千家居涼山者爲生番約數萬戶熟夷完糧納賦遵奉約束生番則多好亂恃其險遠故也其種類錯落雜居多傍山坡誅茅爲屋隨地開墾種雜糧苦苡苞穀燕麥無稻田不知耕種其墾地以所擄漢人爲之黑夷安坐而食所收

雷波廳志

卷三十二

風俗

三

雜糧年僅足用無餘積故夷地多歉歲常出擄掠飲食不烹飪以火炙之用木盒盛而食席地圍坐性喜金銀好飲酒造牛羊毛爲氍衣人披一襲寒暑不易襖衣以布爲之名曰把握禪名黑姑把握氍衣無袖無襟長不及膝名曰蛇落男婦皆赤足男子椎髻於額或穿一耳性暴戾有勇力者強或能歐其父則羣相稱道之好馳馬馬用木鞍能造刀矛鎗戟柴弓弩箭等器逐獸以弓弩技精而不能及遠適可而發發無不中鏃以藥製中者立斃善蓄牧富者馬牛羊豕

以數百計貧者負雜糧柴薪與漢民交易換布帛鹽
菸等物婚娶以牛馬布綢緞鹽酒等物爲聘爭貲財
最甚數必取盈壻家備馬親迎成親後卽歸母家俟
生子女乃還復索財禮不以爲恥也夷婦首戴網罩
金銀器滿頭耳輪懸珊瑚瑪瑙珠粒纍纍然以多爲
貴腰繫統裙裙長及地橫布爲之富者亦好修飾布
帛綾緞色喜紅綠生子浴以冷水赤其體不著片布
能步始披氈嚴寒亦如是不患痘疹地高而涼也婚
喪皆巫禱歌舞病不藥殺豕羊祝神名曰打鬼葬以

雷波廳志

卷三十二

風俗

四

火不棺殮黑夷各統其眾至數十百千不等驅役白
夷如僕隸白夷尊之曰世長公名分雖嚴而偕行雜
坐一無禮節或有爭忿則各率其眾以從事名曰打
冤家雖歷數世而不釋至有子孫微弱不能報復者
眾皆鄙之修好則飲血酒以要盟椎牛懸皮而趨其
下無歷日以龍虎牛羊等物紀之卜則燒羊骨灰以
定吉凶頗有驗過年以十月無定日土司土舍遵奉
正朔衣冠悉如漢制奉公守法世世承襲以率其屬